

Nukissiornermi ikummatissat avatangiisinut akitsuutaat pillugu Inatsisartut inatsisaata allangortinneqarneranik Inatsisartut inatsisissaattut siunnersuut
(Aningaasaqarnermut Naalakkersuisoq)

Saqqummiussissut

Siullermeerneqarnera

Nukissiornermi ikummatissat avatangiisinut akitsuutaat pillugu Inatsisartut inatsisaata allangortinneqarneranik siunnersuut Naalakkersuisut sinnerlugit matumuuna saqqummiuppara.

Nukissiornermi ikummatissat avatangiisinut akitsuutaat pillugu Inatsisartut inatsisaata atuutlernerata kingorna atuuttunngortinniarneqarnerani paasineqarpoq maleruagassiat maannakkutut iluseqartillutik kingunerigaat, timmisartut umiarsuillu Kalaallit Nunaanni akitsuuteqarfiusumut tikittut orsussartik sinneruttoq uttortassagaat, kinguninngualu akitsuusigassaq nalunaarutigisassagaat kiisalu akitsuut akilertassagaat. Tamatuma annertoorujussuarmik allaffissulernissaq kingunerissavaa, soorlutaaq suliffeqarfiit pineqartut aningaasatigut siunertaanngitsumik eqqorneqassasut.

Tassa imaappoq siunnersuutip ilaata uuma siunertaraa motorinut ikummatissap, angallatip akitsuuteqarfiusumut tikinnerani orsussaasivianiittup aammalu angallatip naammineq ingerlatissaatuinnaq naatsorsuussap akitsuusiisussaatitaanermi pineqartunut ilaannginnissaa.

Aamma paasinarsivoq Polaroil umiarsuarnut timmisartunullu nunat tamat akornanni ingerlaartunut il.il. tunisinermi nunat allamiut nioqquteqartuinut unammillersinnaajunnaartoq. Polaroil-ip isertitassamigut taamaalilluni ukiumut 387 mio. kr.-it annaaratarsinnaavai.

Imaalersimavormi Polaroil tunisami akitsuutaanik akiliisartussaasoq, nunat allamiut nioqquteqartuisa nioqqutit assingi umiarsuarnut timmisartunullu nunanut allanut ingerlaartunut il.il. akitsuuteqanngitsumik tunisinnaagaat.

Polaroil-ip taamatut tuniniaanermigut maannakkut isertitai suliffeqarfiup aningaasartuutaanut tamarmiusunut aningaasalersueqataapput. Suliffeqarfiup nalunaarutigaa isertitat taakku Polaroil-ip aningaasartuutaasa aalajangersimasut ingerlatsinermullu aningaasartuutaasa tamarmiusut 19 pct.-iinik aningaasalersuisuusut. Umiarsuarnut timmisartunullu nunanut allanut inger-

laartunut il.il. tunisinikkut isertitat appariaateqarnerat atuisut nalinginnaasut aningaasartuutit tamakku ilaannik amerlanerusunik matussusiisarnissaannik kinguneqassaaq.

Allatut oqaatigalugu, Polaroil-ip tunisaata akitsuutaa orsussap atuisunut nalinginnaasunut tunineqartartup akisunerulerneranik kinguneqaratarsinnaavoq. Tamannaavorlu Naalackersuisut inatsisissatut siunnersuutikkut ugguuna pinngitsoortinniagaat.

Inatsisissatut siunnersuut tassungalu oqaaseqaatit naggasiullugu innersuussutigaakka.

Taamatut oqaaseqarlunga siunnersuut Naalackersuisut sinnerlugit Inatsisartunut suliassanngortippara, aammalu Akileraartarnermut Akitsuusiisarnermullu Ataatsimiititaliami suliarineqareerpat aappassaaniigassanngortillugu.